

Anxo da noite, cazador no escuro  
que vés flamíxero a me expulsar do souto:  
o varal está listo, a sandalia posta,  
o corazón afeito ao longo exilio.

O mundo que eu criei foi só de sombras,  
soños foron os froitos, as vendimas,  
e só o amor brillou, brillou acaso  
tamén o lar da patria sempre aceso  
que me mantén o sangue enaltecido.

Mais a palabra, si, foi sempre viva,  
foi espada e arado e cotovía,  
lanza de señardá, ai meu amigo,  
derrota e singradura. O artificio  
é o que me leva agora a este desterro:  
quero volver á simples moradía  
que un día fixen no dintel do vento,  
á terra de labor, xa feito cinza  
para pular na saiva, e ter de novo  
os paxaros na man...Ese outro tempo!